

Mr. Semir HADŽIMUSIĆ

**NAUČNI SKUP
„KULTURNO-HISTORIJSKO NASLIJEĐE GRADAČCA“
GRADAČAC, 28. MAJ 2016.**

Značajan korak ka dolasku do novih stručnih i naučnih saznanja o prošlosti i kulturno-historijskom naslijeđu Gradačca učinjen je 28. maja 2016. godine organizovanjem naučnog skupa „Kulturno-historijsko naslijeđe Gradačca“. Organizatori su bili: Općina Gradačac, Odsjek za historiju Filozofskog fakulteta Univerziteta u Tuzli, Institut za islamsku tradiciju Bošnjaka, Medžlis islamske zajednice Gradačac i Zavod za zaštitu i korištenje kulturno-historijskog i prirodnog naslijeđa Tuzlanskog kantona. U ime organizatora obratili su se: mr.sc. Edis Dervišagić, prof.dr. Adnan Jahić, dr.sc. Dževada Šuško, mr.sc. Nusret Kujraković i benjamin Bajrektarević, prof. U ime Ministarstva obrazovanja, nauke, kulture i sporta Tuzlanskog kantona u svojstvu izaslanika ministra obratio se Elmir Tukić.



Na skupu je u četiri sesije svoje radove iz historije Gradačca i okoline, od srednjeg vijeka do danas, prezentiralo dvadeset eminentnih imena iz struke i nauke: prof.dr. Ismet Bušatlić, prof.dr. Nusret Isanović, prof dr. Izet Šabotić, prof.dr. Adnan Jahić, dr. hfz. Elvir Duranović, mr.sc. Rusmir Djedović, dr.sc. Omer Hamzić, Osman Kavazović, prof. dr Azem Kožar, Mina Kujović,

mr.sc.Nusret Kujraković , mr.sc.Omer Zulić, mr.sc. Osman Lavić, mr.sc. Kemal Nurkić , mr. Nedim Rabić, mr.sc. Šefko Sulejmanović, prof. dr. Amira Turbić Hadžagić, doc.dr. Elvir Musić, dr. sc Salkan Užičanin, dr.sc. Šuško Dževada i mr. Semir Hadžimusić. Govorilo se o Gradačcu u različitim historijskim periodima, o urbano-geografskim karakteristikama čaršije u Gradačcu krajem 19. stoljeća, Čaršijskoj džamiji, značaju, liku i djelu Husein-kapetana Gradaščevića, kao i izgradnji vjerskih i obrazovnih objekata, radu kulturno-prosvjetnih društava, administrativno-teritorijalnom uređenju i privrednim prilikama između dva svjetska rata. Veoma su zanimljiva bila izlaganja vezana za ulogu vitezova Hospitalaca u Sjevernoj Bosni, razvoju čaršije u Gradačcu krajem 19. stoljeća i slično. Posebna pažnja posvećena je i devastaciji džamija za vrijeme agresije na Bosnu i Hercegovinu, zaštiti arhivske građe u privatnim arhivima, kao i problematici zaštite i korištenja naslijeđa općine Gradačac.



Na kraju Skupa usvojeni su slijedeći zaključci:

- S obzirom na prijavljene i prezentirane radove, naučni skup je ispunio očekivanja i potvrdio naučnu i društvenu opravdanost održavanja. Nova saznanja, na njemu predočena, potaknut će istraživače da se odluče na istraživanje nekih novih tema i oblasti koja do sada nisu bila u fokusu istraživačkih zahvata,
- Izrada elaborata o sadašnjem stanju nacionalnih spomenika Bosne i Hercegovine u Gradačcu sa prijedlogom mjera zaštite,

- Pokretanje inicijative za izdavanje jedne publikacije koja će se baviti kulturno-historijskim naslijeđem Gradačca i okoline,
- Potrebno je digitalizovati Orijentalnu zbirku Zavičajnog muzeja u Gradačcu,
- Odaje se priznanje i izražava zahvalnost svim učesnicima-izlagačima i organizatorima ovog naučnog skupa, a posebno općini Gradačac i načelniku Edisu Dervišagiću, Medžlisu islamske zajednice Gradačac, predsjedniku Jukan Huseinu i glavnom imamu Nusretu Kujrakoviću.



Godine, 2017. je objavljen zbornik radova sa pomenutog naučnog skupa, čime su rezultati naučno-istraživačkog rada publikovani i dostupni široj javnosti.

